

Visoki predstavnik suspendovao trojicu sudija

Visoki predstavnik Paddy Ashdown danas je donio odluke o suspendovanju predsjednika Općinskog suda Široki Brijeg Ivana Brekala, predsjednika Općinskog suda Čapljina Marinka Katića i sudije Vrhovnog suda Republike Srpske Svetislava Stanojevića, koje stupaju na snagu odmah. Suspenzije će biti na snazi dok Visoko sudsko vijeće ne izvrši reviziju svakog slučaja i odluči o odgovarajućim mjerama.

U svakom od ova tri slučaja se radi o navodnom kršenju vladavine zakona nepoštivanjem propisnog sudskog postupka, odnosno povredama samih zakona koje su sudije dužne štiti.

Visoki predstavnik očekuje da će Visoka sudska i tužilačka vijeća koja će, nakon što počnu sa radom ove jeseni igrati centralnu ulogu u reformi sudstva, preispitati ove suspenzije kako bi utvrdili koje dodatne mjere će biti neophodno poduzeti. Visoka sudska i tužilačka vijeća imaju zadatak da osiguraju da se u sudskom sistemu BiH primjenjuju najviši profesionalni standardi i imaće ovlast da imenuju sudije i tužioce, da protiv njih pokreću sudske postupke i da ih smjenjuju.

Visoki predstavnik je u potpunosti svjestan činjenice da do uspostavljanja ovih nezavisnih institucija ne postoji nikakvo sredstvo za poduzimanje mjera kojima bi se zaštitilo povjerenje javnosti u sudski sistem. U svakom slučaju u kojem postoje ozbiljni i vjerodostojni navodi, Visoki predstavnik će poduzeti mjere kako bi zaštitio integritet pravnog postupka i interese građana BiH.